



Gutpela Wasman

No 4/2018

**Jisas Krai i tok,
“Mi gutpela wasman
bilong sipsip.”**

Jon 10.11

God i save bekim askim bilong yumi

God i save harim na bekim prea bilong ol stretpela pikinini

Wanpela boi i winim 4-pela krismas, nem bilong em Erwin. Em i wanpela Sandeskul pikinini long Kugark seket. Olgeta Sande moning em i save i gat laik long i go long Sandeskul na oltaim mama bilong em i save wasim em gut tru na kisim em i go lusim em long Sandeskul haus.

Wanpela Sande tisa i tokim ol pikinini, “Sapos yupela i gat wanpela nid yupela i mas askim Papa God long prea na em bai i givim long yupela. Erwin i harim gut dispela tok bilong Sandeskul tisa. Em i save laikim tru kopi kendi. Wanpela moning Erwin i bin askim mama bilong en long baim wanpela kopi kendi bilong en. Mama bilong en i tokim em, “Yu mas prea na askim Papa God na em bai givim long yu.” Taim Erwin i prea yet mama i save putim kopi kendi klostu long em na taim Erwin i pinisim prea bilong em, em i save kirap nogut long lukim kopi kendi i stap klostu long em. Na em i save amamas stret na kisim.



Erwin i bin hangre long kaikai bisket na em i bin prea inap 2-pela wik olgeta. Tasol em i no kisim wanpela bekim long prea bilong en na em i tokim mama bilong en, “Mama mi laik kaikai bisket stret na mi bin prea planti taim tasol Jisas i no harim prea bilong mi. Na em i no givim bisket long mi.” Mama i lukim Erwin na i kisim Baibel bilong em na ritim wantaim em dispela Baibelves long Jeremaia 33.3,

Yu mas singaut long mi na bai mi bekim beten bilong yu. Na bai mi toksave long yu long ol bikipela samting i hait i stap na yu no save long ol.

Mama i tokim Erwin long prea yet na no ken lusim. Na taim em i prea yet, God i wok long bel bilong wanpela gel long Kainantu na em i pulapim stret wanpela bokis wantaim kain kain ol kaikai na ol basket tu. Em i salim dispela bokis i go stret long haus bilong dispela liklik boi. Erwin i lukim na em i amamas stret na em i tok bikipela tenkyu long Papa God.

Dispela stori i ken helpim na kirapim yumi ol Sandeskul pikinini long prea planti long ol samting yumi i gat nid long en na bai God i ken givim ol dispela samting long yumi.

Ulrich Gomb, EBC Kiunga



Jisas inap harim prea bilong yumi

Tatari em i wanpela liklik boi long Sausi. Olgeta taim em i save go long Sandeskul, maski ren i pundaun o ples i longwe, em i save taitim bun stret long go long Sandeskul.

Long Sandeskul ples, Tatari i save sindaun isi na harim tok bilong God, Sandeskul tisa i autim. Em i save lainim Baibelves gut na em i save bekim ol kwesten gut tru. Em i save prea, tasol em i no save Jisas i harim prea bilong en o nogat.

Tatari i gat wari long ol samting, tasol em i no save em bai i prea olsem wanem. Em i gat mama tasol em i nogat papa. Tatari i save go long skul na em i save lukim ol arapela pikinini i kaikai plawabol na em i save aigris, husat bai baim bilong em.

Long wanpela Sande moning, Tatari i waswas na i go long Sandeskul. Em i sindaun isi na em i harim wanpela stori tisa i autim. Tisa i autim stori bilong Solomon i prea long God, long God i ken givim em gutpela tingting na save na God i givim em (2 Stori 1.3-12). Tisa i stori pinis na em i skulim ol long wanpela Baibelves. *“Jisas i tok moa olsem, yupela i mas prea na askim God long givim ol samting long yupela, na em bai i givim long yupela. Yupela i mas wok long painim ol samting na bai yupela i lukim. Yupela i mas paitim dua na God bai i opim long yupela” (Matyu 7.7).*

Tisa i tokim ol pikinini olsem ol i mas prea long God na God bai givim samting long ol. Jisas i save harim prea bilong ol pikinini.

Tatari i sindaun na tingting na em i tokim em yet, mi save hangre long kaikai plawabol. Nau long dispela nait mi laik slip bai mi prea long Jisas, em bai givim mi fifti toea, na bai

mi baim plawabol. Taim Tatari i laik slip, em i prea na em i ting Mande tasol em bai i kisim dispela fifiti toea.

Sampela de Tatari i no mekim prea gen, em i ting Jisas i no harim em. Wan wik i go pinis na long Mande stret wanpela man i givim fifiti toea long Tatari. Tatari i kirap nogut na em i tingim prea bilong em na em i tok, “Nau Jisas i harim prea bilong mi na em i givim mi fifiti toea.” Tatari i kisim fifiti toea na em i baim 5-pela plawabol na em i kaikai. Long dispela taim Tatari i save olsem Jisas i save harim wari bilong en na em inap long harim wari bilong ol pikinini na ol manmeri tu.

Wayaku Tatari, EBC Sausi

Marimari bilong God long laip bilong mi

Nem bilong mi, Kevin na mi bilong Sepik seket. Mi wanpela boi nogut na mi save mekim planti sin long ai bilong God. Tasol God i marimari long mi na mi stap laip yet long graun.

Long yia 2004, mi bin stap long wanpela skul ol i kolim Mambe Praimeri Skul na mi mekim gret siks bilong mi. Long Krismas mipela i bin gat bikpela pait namel long tupela ples, em ol lain Yamben na Pangaripma.


Tupela ples i gat narapela tokples, i no wankain. Dispela pait em ol i pait long graun. Mi tu bin stap insait long dispela na pait i go bikpela na planti man tu i bin kisim bagarap. Long dispela taim mi wantaim ol poro bilong mi, mipela sanap namel long ol bus i stap na ol tripela man bilong narapela

ples i kam ronim mipela na katim wanpela bikpela mangi bilong mipela. Na ol i ronim mipela ol liklik mangi i go long maunten.

Taim ol i wok long ronim mipela i go long maunten, mi las mangi i ranawe. Mi ran yet, na mi lukim wanpela man i kam klostu long baksait bilong mi na i laik katim mi. Nau wanpela tingting i kam strong long mi na tok yu no ken bihainim rot. Kalap i go long sait bilong rot na mi pas long wanpela bikpela rop na hait aninit long ol gras. Nau dispela man em i stop na em wok long painim mi, tasol em i no lukim mi. Mi stap long sait bilong rot na mi no hait gut. Em i wok long painim mi yet i go tasol nogat na em i go. Long taim mi hait i stap, mi bin prea na tok, “God yu marimari long mi na yu sevim laip bilong mi. Amen!” Pait i pinis na mipela go bek long ples. Long dispela taim mi bin pulim wanpela promis kat i stap long Buk Song 121.5, *“Bikpela em i wasman bilong yu. Em i save sanap klostu long yu na i was long yu.”* Mi lukim dispela ves na tingim olsem wanem Bikpela i helpim mi long dispela taim long pait.

Insait long hevi Kevin i ran i go long maunten tasol man bilong helpim em i kam long we. Em nogat rot na klostu wanpela man i katim em. Husat gutpela wasman i harim prea bilong em na i helpim em long han bilong ol birua? Olsem wanem long yumi pikinini, insait long hevi yu save tingim husat?

Kevin, EBC Sepik





Kwesten taim

Helo pren, ritim gut 3-pela stori i stap long hapsait. Aninit ol askim i stap na ol ansa i stap nabaut. Yu painim aut gut na droim lain i go long hap ansa i stret.



1. Erwin i save prea o nogat?

A. Matyu 7.7

2. Erwin i prea na kisim wanem samting?

B. God, yu marimari long mi na sevim laip bilong mi.

3. Long taim bilong Sandeskul Tatari i save mekim wanem?

C. Em i save mekim planti sin long ai bilong God.

4. Sandeskul tisa i lainim wanem Baibelves long ol Sandeskul pikinini?

D. Bisket

Em i save sindaun isi na harim tok bilong

5. Kevin i save mekim wanem kain pasin?


E. God Sandeskul tisa i save autim.

6. Taim Kevin i hait i stap em i prea olsem wanem?

F. Yes, em i save prea.

Jisas i tok moa olsem, "Yupela i mas prea na askim God long givim ol samting long yupela, na em bai i givim long yupela. Yupela i mas wok long painim samting na bai yupela i lukim. Yupela i mas paitim dua, na God bai i opim long yupela" Matyu 7.7

Gutpela Wasman Tim i laik tok tenkyu long tripela brata i bin raitim stori i kam: Ulrich Gomb EBC Kiunga, Wayaku Tatari EBC Sausi na Kevin EBC Sepik



Published and printed by:
Publications Department
Evangelical Brotherhood Church (Inc.)
P.O. Box 996, Lae 411, Papua New Guinea

No 4/2018